



AKTUELNOSTI

Nastavljena saradnja s udruženjem „Vive Žene“ iz Tuzle Potpisan sporazum o saradnji u pružanju podrške svjedocima

S ciljem unapređenja i daljnjeg jačanja podrške svjedocima i žrtvama nasilja, uključujući naročito žene pogođene seksualnim nasiljem, Tužilaštvo Brčko distrikta nastavilo je saradnju s organizacijama civilnog društva koje se bave zaštitom i unapređenjem njihovog položaja.



Nakon učešća u edukativnim aktivnostima regionalnog projekta o pravnom položaju žena pogođenih ratnim seksualnim i rodnozasnovanim nasiljem na Zapadnom Balkanu, kojeg provodi udruženje *Vive Žene* iz Tuzle juče je u Brčkom, u prostorijama Tužilaštva, upriličeno potpisivanje sporazuma o njihovoj daljnjoj međusobnoj saradnji. Sporazumom između dvaju važnih aktera u osiguranju održive, adekvatne i dugoročne

podrške žrtvama, odnosno svjedocima, kojeg je su potpisali glavni tužilac Tužilaštva Zekerija Mujkanović i predsjednica Udruženja Jasna Zečević, definirane su dodatne aktivnosti u pravcu ostvarivanja zajedničkih ciljeva. Radi osiguranja podrške ženama koje su preživjele seksualno nasilje u ratu, saradnjom su prije svega obuhvaćeni predmeti ratnih zločina, a u skladu s potrebama saradnja će se odnositi i na druge vrste krivičnih djela.

Imajući u vidu da su nasilju često izložena djeca i maloljetnici, žene i druge ranjive kategorije, daljnje unapređenje saradnje s nevladinim sektorom usmjereno je na njihovu potpuniju zaštitu. U tom pravcu Tužilaštvo, pored ostalog, aktivno podržava projekat „*Osnaživanje glasova žena pogođenih ratnim seksualnim i rodnozasnovanim nasiljem na Zapadnom Balkanu - Za kulturu prepoznavanja i pomirenja*“, kojeg u Brčkom provodi udruženje građana „*Vive Žene*“ Tuzla.

